

四庫全書

子部

欽定四庫全書

子部
冊府元龜卷三百八十三
四

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣范鰲

謄錄監生臣戴祖覃

欽定四庫全書

冊府元龜卷三百八十三

宋 王欽若等 撰

將帥部

褒異第九

隋李雅後周時領左右軍征吐谷渾縱奇兵擊破之賜
奴婢百口

李金才為楊素行軍總管破突厥阿勿俟斤於納遠川
進位大將軍

李詢自高祖為丞相以元帥長史平尉遲迥之亂進位上柱國改封隴西郡公賜帛千疋加以口馬

梁睿後周時為大將軍從齊王憲拒齊將斛律明月於洛陽每戰有功遷少冢宰高祖主百揆代王謙為益州總管行至漢川而謙反高祖命睿為行軍元帥討平之進位上柱國總管如故賜物五千段奴婢一千口金二千兩銀三千兩食邑千戶開皇初徵還京師及引見帝為之興命睿上殿握手極歡睿退謂所親曰功遂身退

今其時也遂謝病於家闔戶自守不交當世帝賜以板輿每有朝覲必令三衛輿上殿

于義為梁虜行軍總管時王謙構逆其將達奚悉擁眾據開遠義將左軍擊破之尋拜潼州總管賜奴婢五百口雜綵三千段

陰壽仕周為儀同從武帝平齊進位開府賜物千段奴婢百口女樂二十人高祖為丞相壽以行軍總管鎮幽州即拜幽州總管時有高寶寧者齊氏之疎屬也周武

帝拜為營州刺史連結契丹靺鞨舉兵反壽遣人陰間其所親任者寶寧為其麾下所殺北邊遂安賜物千段卒官贈司空

寶寧定初為平東將軍從周太祖與齊人戰於北印擊卻齊以功拜上儀同後從周武皇帝引突厥木杆侵齊之并州賜物三百段襲爵永富縣公邑千戶進位開府除中州刺史從武帝平齊加上開府拜前將軍飲飛中大夫高祖受禪累遷右武侯大將軍尋除秦州總管賜

吳樂一部突厥沙鉢畧寇邊以為行軍元帥率九總管步騎三萬出涼州數挫其鋒沙鉢畧突厥請盟而去賜緜萬疋進爵安豐郡公增邑一千六百戶轉左武衛大將軍開皇六年卒帝為之廢朝令左衛大將軍元旻監護喪事賻絹三千疋贈冀州刺史陳國公

元景山周閔帝時為撫軍將軍數從征伐累遷儀同三司賜爵文昌縣公授豐川防主後與齊人戰於北邙斬級居多加開府遷建州刺史進封宋安郡公邑三千戶

從周武帝平齊每戰有功拜大將軍改封平原郡公邑
二千戶賜女樂一部帛六千疋奴婢二百五十口牛羊
數千高祖為丞相景山以上將軍率騎與司馬消難將
樊毅馬傑等戰尅之拜安州總管進位柱國前後賜帛
三千疋時桐栢山蠻相聚為亂景山復擊平之高祖受
禪拜上柱國

源雄周太祖時賜爵隴西郡公後周武帝伐齊以功授
開府改封朔方郡公拜冀州刺史時以突厥寇邊徙雄

為平州刺史以鎮之未幾檢校徐州總管及高祖為丞
相時陳人見中原多故遣其將陳紀等侵江北雄與吳
州總管于顛等擊走之又東潼州刺史曹孝達據州作
亂雄遣兵襲擊走之進位上大將軍伐陳之役從秦王
俊出信州道及陳平以功進位上柱國賜物五千段復
鎮朔州

豆盧勣仕周為柱國利州總管高祖為丞相益州總管
王謙作亂勣嬰城固守出奇兵擊之賊因解去高祖遣

開府趙仲卿勞之詔可使持節上柱國及突厥犯塞以
勳為北道行軍元帥以備邊歲餘拜夏州總管詔曰上
柱國楚國公勳蜀人寇亂之日稱兵犯順固守金湯隱
如敵國嘉猷大節其勞已多可食始州臨津縣邑千戶
後以病徵還京師詔諸王並至勳第中使顧問道路不
絕其年卒高祖悼惜者久之特加賜贈鴻臚監護喪事
豆盧通仕周為武賁中大夫北徐州刺史及高祖為丞
相尉遲迥作逆遣其所署莒州刺史烏九尼率衆來攻

通逆擊破之賜物八百段進位大將軍

賀若誼仕周為熊州刺史平齊之役誼率兵出函谷先據雒陽即拜雒州刺史進封建威縣侯齊范陽王高紹義之奔突厥也誼以兵追之戰於馬邑遂擒紹義以功進位大將軍高祖為丞相拜亳州總管西邊司馬消難東拒尉遲迥申州刺史李慧反誼討平之進爵范陽郡公授上大將軍

梁士彥為熊州刺史從周武帝拔晉州進位柱國除使

持節晉絳二州諸軍事晉州刺史及帝還後齊後主親
總六軍而圍之士彥固守孤城及齊平封邲國公進位
上柱國

梁剛仕周為儀同以平尉遲迥功加開府擊突厥有勲
進位上大將軍通政縣公

梁默為行軍總管從楊素北征突厥進位大將軍漢王
諒之反復以行軍總管從楊素討平之加授柱國

宇文忻仕周為儀同三司賜爵興固縣公韋孝寬之鎮

玉壁也以收同行屢有戰功加位開府驃騎將軍進爵
化政郡公邑二千戶從武帝伐齊拔晉陽及齊平進位
大將軍賜物千段尋與烏丸軌破陳將吳明徹於呂梁
進柱國賜奴婢二百口高祖為丞相尉遲迥作亂以收
為行軍總管從韋孝寬擊之迥軍大敗及平鄴城以功
加上柱國賜奴婢二百口牛馬羊萬計高祖顧忻曰尉
遲迥傾山東之衆連百萬之師公舉無遺策戰無全陣
誠天下之英傑也進封英國公增邑三千戶

王誼周武帝時為內史大夫封陽國公從帝伐齊帝賴以全濟及齊平授相州刺史未幾徵為內史汾州稽胡為亂誼率兵擊走及平賊而還賜物五千段高祖為丞相轉汾州總管司馬消難反誼為行軍元帥討平之高祖以誼前代舊臣甚加禮敬之遣使勞問冠蓋不絕拜大司馬誼自以與高祖有舊亦歸心焉及帝受禪顧遇彌厚帝親幸其第與之極歡

元諧為大將軍時高祖為丞相尉遲迥作亂遣兵寇小

鄉令諧擊破之及高祖受禪賜宴極歡進位上大將軍
封樂安郡公邑千戶吐谷渾寇涼州詔諧為行軍元帥
擊破之詔遷上柱國

王世積仕周為上儀同長子縣公高祖為丞相尉遲迥
作亂從韋孝寬擊之每戰有功拜上柱國高祖受禪進
封宜陽郡公未幾授蘄州總管平陳之役以舟師自蘄
水趨九江與陳將紀瑱戰於蘄口大破之又移書告諭
陳諸兵將並降以功進位柱國荊州總管賜絹五百段

加之寶帶邑三千戶後數歲桂州人李光仕作亂世積以行軍總管討平之帝遣都官員外郎辛凱卿馳勞之及還進位上柱國賜物二千段帝甚重之遼東之役與漢王並為行軍元帥至柳州遇疾疫而還拜涼州總管令騎士七百人送之官

高頴周武帝時為下大夫以平齊功拜開府從越王盛擊隰州叛胡平之高祖得政屬意於頴委以心膂尉遲迥之起兵遂自請行大破之因平尉遲迥還常侍宴於

臥內帝撤御帷以賜之進位柱國改封義寧縣公遷丞
相府司馬高祖受禪拜尚書左僕射兼納言進封渤海
郡公俄拜左衛大將軍時突厥屢為寇患詔頰鎮遏緣
邊及還賜馬百餘匹牛羊千計後為左領軍大將軍及
伐陳以頰為元帥長史陳平以功授上柱國高祖幸并
州留頰居守及帝還京賜縑五千疋復賜行宮一所以
為莊舍其夫人賀拔氏寢疾中使顧問絡繹不絕帝親
幸其第賜錢百萬絹萬疋復賜以千里馬

楊素周武帝時為車騎大將軍父沒於齊以素申理贈大將軍及平齊之役素請率父麾下先驅帝從之賜以竹策曰朕方欲大相驅策故用此物賜卿從齊王憲與齊人戰於河陰以功封清河縣子邑五百戶授司城大夫復從憲拔晉州其後每戰有功及齊平加上開府改封成安縣公邑千五百戶賜以粟帛奴婢雜畜高祖為丞相會尉遲迥作亂榮州刺史宇文胄據武牢以應迥高祖拜素大將軍發河內兵擊胄破之遷徐州總管進

位柱國封清河郡公邑二千戶高祖受禪加上柱國帝
方圖江表先是素數進取陳之計未幾拜信州總管賜
錢百萬錦千段馬二百匹而遣之及大舉伐陳以素為
行軍元帥大破賊還拜荊州總管進爵郢國公邑三千
戶真食長壽縣千戶賜物萬段粟萬石加以金寶又賜
陳主妹及女妓十四人轉內史令俄而江南人李稜等作
亂素進討悉平之帝以素久勞於外詔令馳傳入朝加
子玄感官為上開府賜綵物三千段又斬浙江賊帥高

智惠於泉州自餘支黨悉來降附江南大定帝遣左領
衛將軍獨孤陀至浚儀迎勞比到京師問者日至賜黃
金四十斤加銀餅實以金錢纁三千段馬二百匹羊三
千口公田百頃宅一區又為并州道行軍總管討平漢
王諒以功賞物五萬段綺羅千疋諒之妓妾二十人又
為靈州道行軍總管破達頭可汗優詔褒賜纁二萬疋
及萬釘寶帶

楊文思仕周為車騎大將軍治翼州事討平党項羗及

擊破山獠等又從陳王攻齊河陰城又從帝攻拔晉州以勲進授上儀同三司改封永寧縣公增邑至千戶又生擒壽陽劉叔仁及別從王誼破賊於鯉魚柵其後累以軍功遷果毅右旅下大夫高祖為丞相從韋孝寬拒尉遲迥於武陟迥遣其將李雋圍懷州與行軍總管宇文述擊走之破尉遲惇平鄴城皆有功進授上大將軍改封雒川縣公尋拜隆州刺史開皇元年進爵正平郡公加邑二千戶

蘇孝慈為宣納上士從武帝伐齊以功進位開府賜爵
文安縣公邑千五百戶

蘇沙羅仕周為都督後從韋孝寬破尉遲迥以功授開
府儀同三司封通泰縣公及高祖開皇中遷檢校利州
總管事從史萬歲擊西爨累戰有功進位大將軍賜物
千段尋檢校益州總管長史會越雋人王奉舉兵作亂
沙羅從段文振討平之賜奴婢百餘口

李雄周太祖時為輔國將軍從達奚武平漢中定興州

又討汾州胡錄前後功拜驃騎大將軍儀同三司武帝
時為涼州總管長史從滕王道破吐谷渾於青海以功
加上儀同宣帝嗣位從行軍總管韋孝寬畧定淮南雄
以輕騎數百至硤石說下十餘城拜亳州刺史高祖總
百揆徵為司會中大夫以淮南之功加位上開府高祖
受禪拜鴻臚卿進爵高都郡公食邑二千戶

韋洸仕周為開府賜爵衛國縣公高祖為丞相從季父
孝寬擊尉遲迥於相州以功拜柱國進封襄陽郡公邑

二千戶

韋藝為上儀同時高祖為丞相藝從季父孝寬擊尉遲迥及破尉遲惇平相州皆有力焉以功進位上大將軍改封武威縣公邑千戶高祖受禪進封魏興郡公

宇文慶為驃騎大將軍從周武帝拔晉州及齊師大至慶又破高緯拔高壁克并州下信都擒高潛功並居最武帝詔遷大將軍封汝南郡公邑千六百戶尋以行軍總管擊延安反胡平之拜延州總管俄轉寧州總管高

祖為丞相復以行軍總管南征江表師次白帝徵還以
勞進位上大將軍尋加柱國開皇初拜左武衛大將軍
進位上柱國

楊文紀仕周為車騎大將軍安州總管長史將兵迎陳
降將李瑗於齊安與陳將周法尚軍遇擊走之以功進
授開府高祖為丞相改封汾陰縣公從梁睿討王謙以
功進授上大將軍前後增邑三千戶

李禮成仕周為平東將軍以軍功拜車騎大將軍儀同

三司賜爵修陽縣侯伐齊之役從武帝圍晉陽禮成以兵擊南門齊將席毗羅率精甲數千拒帝禮成力戰退之加開府進封冠軍縣公

元褒仕周官至開府北平縣公趙州刺史及高祖為丞相從韋孝寬擊尉遲迥以功超拜柱國進封河間郡公邑二千戶高祖仁壽初以行軍總管擊平嘉州夷獠煬帝即位拜齊州刺史

郭榮周武帝時為宣納中士從帝平齊以戰功賜馬二

十匹錦絹六百段封平陽縣男至高祖仁壽初西南夷
獠多叛詔榮領八州諸軍事行軍總管率兵討之歲餘
悉平賜奴婢三百餘口煬帝即位入為武侯驃騎將軍
後數歲擊平亂夷遷左侯衛將軍從帝西征吐谷渾拜
銀青光祿大夫遼東之役以功進左光祿大夫從軍攻
遼東城榮親蒙矢石晝夜不釋甲冑百餘日帝每令人
窺諸將所為知榮如是帝大悅每勞勉之後拜右侯衛
大將軍楊玄感之亂帝令馳守太原明年復從帝至柳

城遇疾帝令存問動靜中使相望卒於懷遠鎮帝為之廢朝贈兵部尚書賜物千段

李安為黃門侍郎平陳之役高祖以為楊素行軍司馬仍領行軍總管安率衆先鋒大破陳師高祖嘉之進位上大將軍郢州刺史

長孫覽仕周武帝歷小司空從平齊進封薛國公

長孫熾為稍伯下大夫周武帝建德中從信州總管王長述破王謙擒其偽總管元振以功拜儀同三司至煬

帝時歷位大理卿戶部尚書吐谷渾寇張掖令熾率精騎擊之以功授銀青光祿大夫

韓擒虎為廬州總管高祖委以平陳之任平金陵執陳叔寶賜物萬段又與賀若弼爭功於帝前於是進位上柱國賜物八千段其後突厥來朝帝謂之曰汝聞江南有陳國天子乎對曰聞帝命左右引突厥詣擒虎前曰此是孰得陳國天子者擒虎厲然顧之突厥惶恐不敢仰視別封壽光縣公邑千戶

韓僧壽仕周為中旅下大夫高祖得政從韋孝寬平尉
遲迥每戰有功授大將軍封昌樂縣公邑千戶至高祖
開皇中檢校靈州總管事從楊素擊突厥破之進位上
柱國改封江都郡公

韓洪仕周為大都督高祖為丞相從韋孝寬破尉遲迥
於相州加上開府甘棠縣侯邑八百戶高祖受禪進爵
為公尋授驃騎將軍平陳之役授行軍總管及陳平以
功加上柱國

賀若弼為吳郡總管時高祖委以平陳之事若弼獻取
陳十策帝稱善賜以寶刀開皇九年大舉伐陳以弼為
行軍總管平陳有功帝下詔褒揚及見迎勞曰克定三吳
公之功也命登御坐賜物八千段加位上柱國進爵宋
國公真食邑三千戶加以寶劔寶帶金甕金盤各一并
雉尾扇曲蓋雜綵二千段女樂二部又賜陳叔寶妹為
妾拜右領軍大將軍

達奚長儒初仕周太祖為大都督數有戰功假輔國將

軍累遷使持節撫軍將軍平蜀之役常為先鋒攻城野戰所當必破除車騎大將軍儀同三司增邑二百戶又遷驃騎大將軍從武帝平齊遷上開府進爵安成郡公邑千二百戶宣政元年除前將軍勇猛中大夫獲陳將吳明徹以功進位大將軍尋授行軍總管高祖為丞相王謙舉兵於蜀詔長儒擊破之高祖受禪進位上大將軍封蘄春郡公邑二千五百戶

賀婁子幹為秦州刺史與宇文述等擊破尉遲迥於懷

州高祖大悅賜手書進位上開府封武川縣公邑三千戶
開皇元年進爵鉅鹿郡公其年吐谷渾寇涼州子幹為
行軍總管從上柱國元諧擊之功最優詔褒美明年突
厥犯蘭州子幹擊之於是冊授上大將軍徵授營新都
副監尋拜工部尚書突厥犯塞詔子幹以行軍總管從
竇榮定擊之子幹別路破賊斬首千餘級高祖嘉之遣
通事舍人曹威齎優詔勞勉之子幹請入朝詔令馳驛
奉見突厥雍虞閭遣使請降並獻羊馬詔以子幹為行

軍總管出西北道應接之還拜雲州總管以突厥所獻馬百疋羊千口以賜之乃下書曰自公守北門風塵不警突厥所獻還以賜公

史萬歲仕周為開府儀同三司從梁士彥擊尉遲迥每戰先登及迥平以功拜上大將軍後領車騎將軍平陳之役又以功加上開府及高智慧等作亂江南以行軍總管從楊素擊之萬歲率衆二千自東陽別道而進踰嶺越海攻陷溪洞不可勝數前後七百餘戰轉關千餘

里寂無聲聞者十旬遠近皆以為沒萬歲以水陸阻絕
信使不通乃置書竹筒中浮之於水汲者得之以言於
素素大悅上其事高祖嗟嘆賜其家錢十萬還拜左領
軍將軍

劉方仕周為承御上士尋以戰功拜上儀同高祖為丞
相方從韋孝寬破尉遲迥於相州以功加開府賜爵河
陰縣侯邑八百戶高祖受禪進爵為公開皇三年從衛
王爽破突厥於白道進位大將軍

馮昱多權略有武藝高祖為丞相以行軍總管與王誼
李威等討叛蠻平之拜柱國

王擲驍勇善射高祖以其有將帥才每以行軍總管屯
兵江北禦陳寇數有戰功伐陳之役及高智慧反攻討
皆有殊績遷柱國

李充少慷慨有英略開皇中頻以行軍總管擊突厥有
功官至上柱國武陽郡公

楊武通性果烈善馳射數以行軍總管討西南夷每有

戰功進封白水郡公

陳永貴以勇烈知名高祖甚親愛之數以行軍總管領邊每戰必單騎陷陣官至柱國蘭利二州總管封北陳郡公

房兆剛毅有武略頻以行軍總管擊胡有功官至柱國徐州總管

王長述高祖為丞相時授信州總管部內夷獠猶有未賓長述討平之進位上大將軍又陳取王謙之策帝大

悅前後賜黃金五百兩授行軍總管率衆討謙以功進位柱國開皇初復獻平陳之計帝善其能頻加賞勞後數歲以行軍總管擊南寧未至道病卒帝甚傷惜之令使者弔祭贈上柱國冀州刺史

李衍為義州刺史從韋孝寬鎮玉壁城數與賊戰敵人憚之及齊平以軍功進授大將軍改封真鄉郡公拜左宮伯賜雜綵三百疋奴婢二十口及王謙作亂高祖以行為行軍總管從梁睿平之進位上大將軍賜縑二千

足開皇元年又以行軍總管討叛蠻平之進位柱國賜帛二千疋及大舉伐陳授行軍總管

田仁恭仕周為開府儀同三司中外府掾從宇文護征伐數有戰功改封襄武縣公邑五百戶從武帝平齊加授上開府進封浙陽郡公增邑二千戶高祖為丞相進位大將軍從韋孝寬破尉遲迥於相州拜柱國

杜整為左武衛將軍開皇中密進取陳之策高祖善之於是行軍總管鎮襄陽病卒帝聞而傷之贈帛四百

足米四百石

薛世雄初從周武帝為帥都督開皇中數有戰功累遷儀同三司又為玉門道行軍大將擊降伊吾進位正議大夫賜物二千段

李徹為車騎大將軍周武帝時從皇太子西征吐谷渾以功賜爵周昌縣男邑三百戶復從帝破齊師於汾北乘勝下高壁拔晉陽擒高潛於冀州俱有力焉錄前後功加開府別封蔡陽縣公邑千戶至高祖受禪為左武

衛將軍總管王府軍事進爵齊安郡公及突厥沙鉢略
可汗犯塞與李充率精騎五千出其不意掩擊大破之
以功加上大將軍

杜彥仕周為龍州刺史賜爵永安縣伯高祖為丞相從
韋孝寬擊尉遲迥於相州每戰有功賜物三千段奴婢
三十口進位上開府開皇中為左武衛將軍平陳之役
以行軍總管與新義公韓擒虎相繼而進及平陳賜物
五千段粟六千石進位柱國高智慧作亂復以行軍總

管從楊素討平之賜奴婢百餘口拜洪州總管

高勵為光州刺史高祖為丞相時上取陳五策及大舉
伐陳以勵為行軍總管從宣陽公王世積下陳江州以
功拜上開府賜物三千段

爾朱敞為驃騎大將軍周武帝東征上表求從許之攻
城陷陣所當皆破進位上開府除南光州刺史入為護
軍大將軍轉膠州刺史高祖受禪改封邊城郡公黔安
蠻叛命敞討平之師旋拜金州總管

獨孤楷仕周為車騎將軍其後數從征伐賜爵廣阿縣公邑千戶拜右侍下大夫

周本從韋孝寬平淮南以功賜子景雲爵西河縣公高祖為丞相進授開府及受禪拜右監門將軍進封汝陽郡公

乞伏慧周武帝時為熊渠中大夫高祖為丞相從韋孝寬擊尉遲惇於武陟所當皆破授大將軍賜物八百段及平尉遲迥進位柱國賜爵河西郡公邑三千戶賚物

二千三百段

張威仕周位至柱國高祖以威為行軍總管從元帥梁
睿擊王謙平之進上柱國拜瀘州總管

和洪周武帝時為車騎大將軍儀同三司時龍州蠻任
公忻李國立等聚眾為亂洪擒斬之從帝攻河陰洪力
戰陷其西門帝壯之賜物千段復從帝平齊進位上儀
同賜爵北平侯邑八百戶拜左勳曹下大夫柱國王軌
之擒吳明徹也洪有功焉加位開府遷折衝中大夫尉

遲迥作亂相州以洪為行軍總管從韋孝寬擊走之又破尉遲惇於武陟及破平相州每戰有功拜柱國封廣武郡公邑二千戶前後賜物萬段奴婢五十口金銀各百錠牛馬百疋

宇文弼初為內史從周武帝平齊以功拜上儀同封武威縣公邑千五百戶賜物千五百段奴婢五十口牛羊千餘頭拜司州總管司錄宣帝時為監軍從梁士彥攻拔壽陽尋改封安樂縣公增邑六百戶賜物六百段加

以口馬俄轉南司州刺史遇陳將樊毅戰於漳口虜獲
三千人除黃州刺史尋轉南定州刺史高祖開皇初以
前功封平昌縣公加邑一千二百戶三年突厥寇甘州
以行軍司馬從元帥竇榮定擊破之還除太僕少卿轉
吏部侍郎平陳之役攷持節為諸軍節度仍領行軍總
管劉仁恩之破陳將呂仲肅也攷有謀焉加開府擢拜
刑部尚書

張衡為揚州總管司馬開皇中熙州李英林聚眾反署

置百官以衡為行軍總管率步騎五萬人討平之拜開府賜奴婢一百三十口物五百段金銀雜畜稱是

崔仲方為會州總管時諸羗猶未賓附高祖詔令仲方擊之與賊三十餘戰諸部悉平賜奴婢一百三十口黃金三十金雜物稱是

于仲文為大將軍高祖初為丞相尉遲迥之亂仲文討之河南既平勒石紀功樹於泗上入朝京師高祖引入卧内宴享極歡賜雜綵千餘段妓女十人拜柱國河南

道大行臺

李景以行軍總管從王世積伐陳陷陣有功進位上開
府賜奴婢六十口物千五百段及高智慧等作亂江南
復以行軍總管從楊素擊之還授鄜州刺史遼東之役
為馬軍總管後為代州總管時漢王諒作亂景發兵擊
破之景尋被徵入京進位柱國拜右武衛大將軍賜纁
九千疋女樂一部加以珍物景智略非所長忠直為時
所許帝甚信之擊叛蠻向思多破之賜奴婢六十口又

擊吐谷渾於青海破之進位光祿大夫賜奴婢六十口
縑二千疋又攻高麗武列城破之賜爵苑丘侯物一千
段

冊府元龜卷三百八十三

欽定四庫全書

冊府元龜卷三百八十四 宋 王欽若等撰

將帥部

褒異第十

隋慕容三藏開皇中為開府儀同大將軍副行軍總管
韋洸討嶺南酋長王仲宣以功授大將軍賜奴婢百口
加以金銀雜物

魚俱羅為大都督從晉王平陳以功拜開府賜物一千

五百段未幾沈玄愴高智慧作亂江南楊素以俱羅壯勇請與同行每戰有功加上開府高唐縣公又與素擊突厥以功進位柱國

張定和為驃騎將軍從上柱國李充擊突厥先登陷陣虜刺之中頸定和以草塞瘡而戰神氣自若虜遂敗走高祖聞而壯之遣使者齎藥馳詣定和所勞問之進位柱國封武安縣侯賞物二千段良馬二匹金百兩

張翁自高祖作相授大都督領鄉兵賀若弼之鎮壽春

也常為間諜平陳之役頗有功焉進位開府儀同三司
封文安縣子邑八百戶賜物二千五百段粟二千五百
石歲餘率水軍破逆賊笮子游於京口薛子建於和州
徵入朝拜大將軍高祖命昇御座而宴之謂翕曰卿可
為朕兒朕為卿父今日聚集示無外也後賜綺羅千匹
綠沉甲獸文具裝尋從楊素征江表別破高智慧於會
稽吳世華於臨海進位上大將軍賜奴婢六十口縑綵
三百疋開皇十八年為行軍總管從漢王諒征遼東諸

軍多物故翕衆猶全高祖善之賜物二百五十段

郭衍周武帝時為大將軍從武帝與齊主大戰於晉州
追齊師至高壁敗之仍從平并州以功加開府武安縣
公邑一千二百戶尉遲迥之起擊其餘黨於濟北累戰
破之超上柱國封武山郡公賞物七千段

李圓通領左翊衛驃騎將軍伐陳之役以行軍總管從
楊素出信州道以功進位大將軍進封萬安縣侯

王韶為軍正周武帝既拔晉州意欲班師韶諫止及平

齊氏以功進位開府封晉陽縣公邑五百戶賜口馬雜畜以萬計高祖受禪累加大將軍晉王之鎮并州也除行臺右僕射賜綵五百匹平陳之役以本官為元帥府司馬及尅金陵進位柱國賜奴婢三百口棉絹五千段

史祥為左衛將軍煬帝即位漢王諒發兵作亂遣其將綦良自滏口徇黎陽塞白馬津余公理自太行下河南帝以祥為行軍總管皆大破之進位上大將軍賜縑綵七千段女妓十人良馬二十匹轉太僕卿祥從征吐谷

渾率衆出間道擊虜破之俘男女二千餘口賜奴婢六十人馬二百匹進位左光祿大夫拜左驍衛將軍

楊義臣高祖仁壽初拜為朔州總管賜以御甲煬帝嗣位漢王諒作亂代州總管李景為諒將喬鍾葵所圍詔義臣救景義臣與戰破之以功進位上大將軍賜物二千段雜綵五百疋女妓十人良馬二十匹

來護兒為上開府從楊素破高智慧盛道延進位柱國封永寧郡公高祖嘉其功使畫工圖其像以進尋詔追

入朝賜以宮女寶刀駿馬錦綵等物煬帝時為左驍衛
大將軍煬帝大業六年從駕江都賜物千段令上先人
冢宴父老州里榮之

陳稜為東萊留守楊玄感之亂也稜率兵至江都襲破
彭城賊帥孟讓以功進位光祿大夫賜爵信安侯及煬
帝幸江都遣稜率宿衛兵擊李子通往見克捷超拜左
禦衛將軍

王辯為車騎將軍煬帝初漢王諒之作亂也從楊素討

平之賜爵武寧縣男邑三百戶遼東之役以功加通議大夫尋遷武賁郎將及上谷魏刀兒劫掠趙帝引辯升御座問以方畧辯論取賊形勢帝稱善於是發從行步騎三千擊敗之賜黃金二百兩渤海賊帥高士達自號東海公衆以萬數辯擊之屢挫其銳帝在江都宮聞而馳召之及引見禮賜甚厚復令往信都經略士達於是復戰破之優詔褒顯之

周羅睺初仕陳宣帝為使持節都督霍州諸軍事平山

賊十二洞除右將軍始安縣伯邑四百戶總檢校揚州
內外諸軍事賜金銀三千兩高祖時從楊素擊突厥大
破之進位大將軍煬帝即位授左武侯大將軍漢王諒
反詔赴楊素討平之進授上大將軍

段文振初仕後周為中外府兵曹從武帝攻齊晉州下
之賜物千段授上儀同進平鄴都又賜綺羅二千疋開
皇末為太僕卿越雋蠻叛擊平之賜奴婢二百口煬帝
時為兵部尚書從征吐谷渾以功進位右光祿大夫後

為左候衛大將軍卒贈光祿大夫尚書左僕射北平侯
賜物一千段粟麥二千石威儀鼓吹送至墓所

宇文述周武帝時為英果中大夫高祖為丞相尉遲迥
作亂以行軍總管擊其將李儁破之及平尉遲迥每有
戰功超拜上柱國進爵褒國公賜縑三千疋開皇初拜
右衛大將軍平陳之役以行軍總管率眾擊陳軍大敗
之吳會悉平以功賜物三千段拜安州總管開皇末為
太子左衛率煬帝嗣位拜左衛大將軍三年加開府儀

同三司每元會冬正朝會輒給鼓吹一部大業中征高麗為扶餘道將軍臨發帝謂述曰禮七十者行役以婦人從公宜以家累自隨古稱婦人不入軍謂臨戰時耳至於營壘之間無所傷也項籍虞姬即其故事

周法尚為巴州刺史破三鴟叛蠻復從柱國王誼擊走陳寇遷衡州總管四州諸軍事改封譙郡公邑二千戶高祖幸雒陽召之及引見賜金鈿酒鍾一雙綵五百段良馬十五疋奴婢三百口給鼓吹一部法尚固辭帝曰

公有大功於國特給鼓吹者欲令公卿知朕之寵公也
伐陳之役以行軍總管隸秦孝王率舟師擊破其城州
刺史熊門超擒於陣轉鄂州尋遷永州總管安集嶺南
賜繡五百段良馬五百疋仍給黃州兵三千五百人為
帳內又降斬陳桂州刺史錢季卿等賜綵五百段奴婢
五十口并銀甕寶帶良馬十匹又為嶺南安撫大使後
數年入朝以本官宿衛賜綵三百段米五百石絹五百
疋未幾與上柱國王世積討平桂州李光仕賜奴婢百

五十口黃金百五十兩銀百五十斤仁壽中遂州獠叛
復以行軍總管討平之雋州烏蠻反詔法尚擊破之賜
奴婢百口物三百段蜀馬二十匹煬帝時拜左武衛將
軍賜良馬一匹絹三百疋又擊破黔安夷向思多還從
討吐谷渾逐捕亡散至于青海賜奴婢一百口物三百
段馬七十匹又領會寧太守遼東之役以舟師指朝鮮
道會楊玄感反與將軍宇文述等破之以功進右光祿
大夫賜物九百段又擊齊盜王薄孟讓等每挫其銳賜

奴婢百口

王仁恭為車騎將軍從楊素擊突厥於靈武以功拜上
開府賜物三千段以驃騎將軍典蜀王軍事山獠作亂
蜀王命仁恭討破之賜奴婢三百口煬帝嗣位漢王諒
舉兵反從楊素擊平之以功進位大將軍拜呂衛二州
刺史賜帛四千匹女妓十人遼東之役仁恭為將軍及
帝班師仁恭為殿遇賊擊走之進授光祿大夫賜絹六
千段馬四十匹明年復為前軍賜良馬十匹黃金百兩

仁恭遂進軍至新城賊數萬背城結陣仁恭擊破之帝聞而大悅遣舍人詣軍勞問賜以珍物進授光祿大夫賜絹五千匹

董純仕周為典馭下大夫從武帝平齊以功拜儀同進爵大興縣侯增邑通前八百戶高祖受禪累遷驃騎將軍後以軍功進位上開府開皇末以勞舊拜左衛將軍煬帝初漢王諒作亂并州以純為行軍總管河北道安撫副使從楊素擊平之以功拜柱國進爵為郡公增邑

千戶轉左驍衛將軍賜女妓十人縑五千疋

趙才為右驍衛將軍從煬帝征吐谷渾以行軍總管率
衛尉卿劉權兵部侍郎劉雅等出合河道與賊相遇擊
破之以功進位金紫光祿大夫

李子雄為帥都督時高祖作相從韋孝寬破尉遲迥於
相州拜上開府賜爵建昌公高祖受禪為驃騎將軍伐
陳之役以功進位大將軍煬帝初漢王諒之作亂也子
雄授上大將軍力戰破之遷幽州總管

趙元淑為驃騎將軍煬帝嗣位漢王諒作亂元淑從楊素擊平之以功進位柱國拜德州總管

裴仁基開皇中為親衛平陳之役先登陷陣拜儀同賜物千段以本官領漢王諒府親信煬帝時為武賁郎將從將軍李景討叛蠻向思多於黔安以功進位銀青光祿大夫賜奴婢百口絹五百疋

唐李高遷為右三統軍從高祖平霍邑圍京城力戰功最累遷左武衛大將軍封江夏郡公檢校西麟州刺史

錢九隴為左監門郎將從高祖平薛仁杲劉武周以前
後戰功累遷右武衛大將軍又從太祖擒竇建德平王
世充從隱太子討劉黑闥於魏州力戰破賊策勲為最
累封郇國公

樊興為右監門將軍從太宗破薛舉平王世充竇建德
積戰功累封營國公賜物二千段黃金三十錠

公孫武達為檢校右監門將軍肅州刺史擊斬突厥於
張掖河太宗璽書慰勞拜左監門將軍又授詔擊鹽州

叛突厥餘黨幾盡進封東萊郡公

張長遜武德初為五原太守及征薛舉長遜不待命而
至以功拜豐州總管進封巴國公邑三千戶賜以錦袍
後為右武侯將軍屬有疾高祖親幸其第以視之其見
重如此

唐儉自太宗為渭北道行軍元帥以儉為司馬平京城
加光祿大夫

長孫順德自高祖起義兵拜統軍從平霍邑破臨汾下

絳郡俱有戰功尋與劉文靜擊屈突通執通歸京師仍
略定陝縣高祖即位拜左驍衛大將軍封薛國公武德
九年與秦叔寶等討建成餘黨於玄武門太宗踐阼真
食千二百戶特賜以宮女

殷嶠字開山太宗為渭北道元帥引為長史與統軍劉
宏基率兵長安城隋將衛孝節自金光門出戰嶠與宏
基擊破之京城平賜爵陳郡公武德二年兼陝東道大
行臺兵部尚書從太宗討平王世充以功進爵鄖國公

復從征劉黑闥道病卒太宗親臨喪哭之甚慟贈陝東道大行臺右僕射

柴紹為右領軍大都督府長史大軍發晉陽兼領馬軍總管及義師至霍邑紹力戰宋老生有功下臨汾平絳郡並先登陷陣授右光祿大夫武德元年累遷左翊衛大將軍尋從太宗平薛舉破宋金剛攻平王世充於雒陽擒竇建德於武牢封霍國公賜實封千二百戶貞觀元年拜右衛大將軍二年擊梁師都於夏州平之轉左

衛大將軍七年加鎮軍大將軍行右驍衛大將軍改封
譙國公十二年寢疾太宗親自臨問尋卒贈荊州都督
馬三寶為太子監門率別擊叛胡劉拔真於北山破之
又從平薛仁果遷驍衛將軍後從柴紹擊吐谷渾於岷
州前後虜男女數千口累封新興縣公

屈突通初為太宗行軍元帥長史從平薛舉特賜金銀
六百兩綵物一千段尋以本官判陝東道行臺僕射及
大兵圍雒陽竇建德且至太宗中分麾下以屬通令與

齊王元吉圍守雒陽世充平通功為第一尋拜陝東大
行臺右僕射

姜行本為左屯衛將軍高昌之役以行軍副總管率眾
先出伊州遂與侯君集進平高昌璽書勞之進封金城
郡公賜物一百五十段奴婢七十人後從太宗征高麗
至蓋牟城中流矢卒太宗賦詩以悼之贈左衛大將軍
鄜國公陪葬昭陵

竇軌武德初為秦州總管時赤排羌寇漢中軌與賊連

戰皆捷餘黨悉降進封鄴國公

竇琮初為高祖大將軍府統軍從平西河破霍邑拜金
紫光祿大夫封扶風郡公與段志玄等力戰隋大軍潰
進兵東略下陝縣收太原拜左領軍大將軍賜物五百
段武德初以元謀之勲特恕一死拜右屯衛大將軍復
轉為左領軍時將圍雒陽遣琮留守陝城以督糧運王
世充遣其驍將羅士信來斷糧道琮潛使人說以利害
士信遂帥衆降及從平東都賞物一千四百段後以本

官檢校晉州總管尋從隱太子討平劉黑闥以功封譙國公賞黃金五十斤

竇抗為左武侯大將軍從太宗平薛舉勲居第一又從征王世充及東都平冊勲太廟者九人抗與從弟軌俱預焉朝廷榮之賜女樂一部金寶萬計

竇璡為民部尚書從太宗平薛仁杲以功特賜錦袍尋鎮益州

李孝常隋末為華陰令率兵守永豐倉陰圖附義以倉

城來降拜為左衛大將軍從平薛仁果力戰有功高祖又念以其倉歸義手勅褒美進爵義安王邑三千戶著屬籍宗正高祖臨朝每賜同榻而坐其寵遇如此

牛進達為左武衛將軍從侯君集為交河道總管征高昌有功累封琅邪公賜物一千三百段

李思摩為右武衛將軍從征遼東為流矢所中太宗親為吮血其見顧遇如此未幾卒於京師贈兵部尚書夏州都督賜東園秘器陪葬昭陵為冢像白道山任依舊

法燒訖然後葬

王君廓為右領軍鎮幽州會突厥入寇君廓邀擊破之
俘斬二千餘人獲馬二十匹高祖聞而大悅止之入朝
賜以御馬令於殿庭乘之而出又謂侍臣曰吾聞相如
叱秦王目皆出血君廓往擊竇建德將出戰徐勣遏之
君廓發憤大呼目及鼻耳一時流血此之壯氣何謝古
人不可以常例賞之復賜紫袍金帶

竇靜為夏州都督值突厥攜貳諸將出征多詣其所靜

知虜中虛實潛令人間其部落郁射所部鬱孤尼等九俟斤並率衆歸款太宗稱善賜馬百匹羊千口

李大亮為安州刺史高祖令徇廣州以東行次九江會輔公柘反大亮以計擒公柘將張善安公柘尋遣兵圍猷州刺史左難當嬰城自守大亮率兵進拔擊賊破之以功賜奴婢百人大亮謂曰汝輩多衣冠子女破亡至此吾亦何忍以汝為賤隸乎一皆放遣高祖聞而嘆異復賜僮婢二十人及討吐谷渾以大亮為河東道行軍

總管與大總管李靖等出北路涉青海歷河源遇賊於蜀渾山接戰破之俘其名王雜畜萬計以功進爵為公賜物千段奴婢一百五十人

李靖為行軍總管兼攝趙郡王孝恭行軍長史高祖以孝恭未更戎旅三軍之任一以委之擊蕭銑以功授上柱國封永康縣公賜物二千五百段又為嶺南道撫慰大使檢校桂州總管時輔公柘於丹陽反詔孝恭為元帥靖為副以討之江南悉平於是置東道行臺拜靖行

臺兵部尚書賜物千段奴婢百口馬百匹及突厥寇太原以靖為行軍總管尋檢校安州大都督高祖每云李靖是蕭銑輔公柘膏肓古之名將韓白衛霍豈能踰之太宗嗣位拜刑部尚書並錄前後功賜實封四百戶又為代州道行軍總管進擊定襄破之以功進封代國公賜物六百段及名馬寶器貞觀初妻亡有詔墳塋制度依漢霍光故事象燕然及積石山以旌殊績靖有疾太宗親幸第流涕謂曰公是朕平生舊交又於國有大功

忽聞疾病深以為憂賜絹一千匹及薨冊賜司徒并州都督給班劍四十人羽葆鼓吹陪葬昭陵

張儉為營州都督兼護東夷校尉太宗將至遼東拜行軍總管進渡遼趨建安城賊徒大潰以功累封皖城郡公賞賜甚厚

郭孝恪為安西都護會焉耆王與西突厥通親相為唇齒進貢希至孝恪表請擊之太宗許焉以孝恪為西州道行軍總管虜其王齒龍突騎支而還太宗嘉其遠立

殊功遣使優勞加勲十一轉

程務挺為雒州刺史從太宗平劉黑闥以功拜營州都督府長史封東平郡公賜物二千段黃金三百兩

段德操為左武衛將軍延州道行軍總管以功拜柱國爵為郡公邑千戶賜以貂裘金帶布帛千匹

姜確為左屯衛將軍征遼行軍總管攻蓋牟城中流矢卒太宗甚哀悼為五言詩以傷之時人榮之賜東園秘器陪葬昭陵墳高六丈

王君愕為左武衛將軍從征遼戰傷還卒於營太宗深痛悼之賜東園秘器陪葬昭陵墳高六大

劉瞻為浩州刺史時劉武周連年為寇鄰城多陷賊數攻之輒為瞻所敗及裴寂之敗也晉州以北連城悉陷唯瞻獨守李仲文以兵保之二人並力拒戰賊來攻之輒挫其銳及太宗復并州高祖遣使勞苦之賜帛三萬疋米麥千石頒其將士

李君羨少以勇氣聞從太宗破宋金剛以功授上柱國

驃騎將軍加賜牛馬錦帛及宮人拜左衛府中郎將突厥來至渭橋君羨與尉遲敬德等大破其衆太宗謂之曰盡如我君羨用心國賊亦何憂改授左武侯中郎將封武連縣公

蘇定方貞觀初為匡道府折衝隨李靖襲突厥頡利于磧口為前鋒悉降之軍還授左武侯中郎將高祖時為行軍總管征賀魯擒之以功遷左驍衛大將軍封邢國公俄有思結闕俟斤都曼先鎮諸胡擁其所部及疎勒

朱俱般蔥嶺三國復叛詔定方為安撫大使率兵討之
都曼面縛出降蔥嶺已西悉定以功加食邑邢州鉅鹿
真邑五百戶顯慶五年從幸太原制授熊津道大總管
率師討百濟平之賞賜珍寶不可勝計俄遷左武衛大
將軍乾符二年卒褒贈幽州都督

尉遲敬德為右府統軍從太宗擊王世充於東都世充
驍將單雄信領騎直趨太宗敬德翼太宗以出賊圍賜
金銀各一篋恩盼日隆又從破徐圓朗累有戰功授秦

王府左二副護軍敬德歷廊夏二州都督封鄂國公後
解職顯慶中卒高宗舉哀於東雲龍門廢朝三日詔京
官朝集使五品以上并赴宅哭仍遣黃門侍郎劉祥道
持節賫璽書往弔贈司徒并州都督所司備禮冊命給
班劍三十人及羽葆鼓吹

薛仁貴自太宗遼東之役以勇敢聞擢授游擊將軍雲
泉府果毅仍令北門長上并賜生口十人高宗顯慶二
年詔仁貴副程名振於遼東經略破高麗以功封河東

縣男尋又領兵擊九姓突厥於天山將行高宗內出甲
令試之仁貴射五重高宗大驚更取堅甲以賜之時九
姓有衆十餘萬來挑戰仁貴擒其偽葉護兄弟三人而
還乾封初高麗內附仁貴擊敗其餘衆高宗手勅勞之
復遷左領軍衛將軍檢校代州都督病卒贈左驍衛大
將軍官造靈輿并家口給傳還鄉

劉弘基為右光祿大夫義師至河東弘基以兵千人先
濟河進下馮翊為渭北道大使渡渭水屯於長安逆擊

衛文昇一戰而捷高祖大悅賜馬二十匹及破京城功
為第一從太宗擊薛舉於扶風破之累拜右領都督封
河間郡公武德元年拜驍衛大將軍以元謀之勲恕其
一死又為左一總管從太宗擊破宋金剛累封任國公
尋從擊劉黑闥於洛州師旋授秉鉞將軍備胡寇於北
鄙九年以佐命功真食九百戶太宗征遼東以弘基與
前軍大總管從擊高延壽於駐驛山力戰有功太宗屢
加勞勉高宗永徽元年加實封通前一千一百戶其年

卒高宗為之舉哀廢朝三日贈開府儀同三司并州都督

馮盎為上柱國貞觀中羅賓諸洞獠叛詔令盎率部落二萬為諸軍先鋒斬首千餘級太宗令其子智戴慰省之前後賞賜不可勝數

阿史那社尒為左驍衛大將軍貞觀十四年授行軍總管以平高昌諸人咸即受賞社尒以未奉詔旨秋毫無所取軍還太宗美其廉慎以高昌所得寶刀并雜綵

千段賜之仍令檢校北門左屯營封畢國公十九年從
太宗征遼所部兵士人百其勇師旋兼授鴻臚卿

契苾何力為右驍衛大將軍太宗征遼東以何力為前
軍總管軍次白崖城為賊所圍被稍中腰瘡重疾甚太
宗自為傅藥高宗乾封初為遼東道行軍總管拔平壤
城虜其王還授鎮軍大將軍行左衛大將軍徙封梁國
公

劉仁軌高宗乾封初為右相兼檢校太子左中護累前

後戰功封樂城縣男咸亨五年為雞林大總管東伐新羅仁軌率兵徑渡瓠蘆河破其北方大鎮七重城以功進爵為公

黑齒常之為左領軍員外將軍高宗儀鳳中吐蕃犯邊常之從李敬玄劉審禮擊之審禮敗敬玄欲抽軍引却阻泥溝而計無所出常之夜率敢死士五百人進掩賊營吐蕃大首領跋地設棄軍宵遁敬玄因此得還高宗嘆其才略擢授左武衛將軍兼檢校左羽林軍賜金五

百兩絹五百疋仍充河源軍副使吐蕃贊婆及素和貴等賊徒三萬餘屯於良非川常之率精騎三千夜襲營殺獲二千級獲羊馬數萬贊婆等單騎而遁授常之為河源道經略大使又賞物四百疋

王峻玄宗開元初為隴右羣牧使吐蕃寇臨洮峻率所部擊之大潰以功加銀青光祿大夫封清源縣男兼原州都督仍拜其子班為并州大都督府長史明年討突厥殺掠甚衆以功遷左散騎常侍持節朔方道行軍大

總管十一年代張說為相追錄破胡之功加金紫光祿大夫仍充朔方軍節度大使

張說為朔方軍節度大使時慶州方渠降胡康願子自立為可汗舉兵反說以討賊功賜實封三百戶

郭虔瓘為左驍衛將軍兼北庭都護開元二年春突厥默啜遣其子移涅可汗及同俄特勒率精騎圍逼北庭虔瓘固守使勇士伏於路左斬同俄賊衆乞降以功拜冠軍大將軍行右驍衛大將軍又下制進封太原郡開

國公俄轉安西副大都護攝御史大夫四鎮經略安撫使進封潞國公賜實封一百戶

郭知運為檢校伊州刺史兼伊吾軍使開元二年春副郭虔瓘破突厥於北庭以功封介休縣公知雲麾將軍擢拜右武衛將軍吐蕃入寇隴右知運擊敗之拜鄯州都督隴右諸軍節度大使六年又率兵討吐蕃掩獲萬計獻捷拜知運為兼鴻臚卿攝御史中丞加封太原郡公八年六州胡康待賓等反詔知運與王晙討平之拜

左武衛大將軍賜金銀器百事雜綵千段九年卒於軍
贈涼州都督錫米粟五百斛絹帛五百段

王君奐為右衛副率及郭知運卒遂代為河西隴右節
度使遷右羽林軍將軍判涼州都督事開元十六年冬
吐蕃大將悉諾邏率衆入寇太斗谷又移攻甘州君奐
襲至青海俘獲其衆及羊馬萬數以功遷羽林軍大將
軍依舊判涼州都督封晉昌伯玄宗又常於廣達樓引
君奐及妻夏氏設宴賜以金帛

張守珪為平樂府別駕開元初突厥入寇北庭守珪請引兵自蒲昌輪臺擊之及賊敗以功特加游擊將軍後十五年授瓜州刺史吐蕃暴至城下守珪縱兵擊敗之以功加銀青光祿大夫仍以瓜州為都督府以守珪為都督二十一年轉幽州長史兼御史中丞營州都督河北節度副大使先是契丹及奚連年為邊患及守珪到官頻出擊之每戰皆捷斬契丹首領可突于首傳於東都明年春守珪獻捷會籍田禮畢酬宴玄宗賦詩以褒美

之拜守珪為輔國大將軍右羽林大將軍兼御史大夫
仍賜雜絲一千疋及金銀器物等

王忠嗣為左威衛將軍河西討擊副使兼檢校代州都
督為王昱所陷貶東陽府左果毅屬河西節度使杜希
望謀拔新城玄宗詔追忠嗣赴河西既下新城忠嗣之
功居多因授左威衛郎將專知行軍兵馬又大破吐蕃
以功最詔拜左金吾衛將軍同正員



冊府元龜卷三百八十四

欽定四庫全書

子部

冊府元龜卷三百八十五至

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣范 釐

校對官中書臣王燾憲

謄錄監生臣戴朝琛

謄錄監生臣朱績曾

欽定四庫全書

冊府元龜卷三百八十五

宋 王欽若等撰

將帥部

褒異第十一

唐李嗣業為中郎將玄宗天寶七載安西都知兵馬使
高仙芝奉詔總軍專征勃律選嗣業與郎將田珍為左
右陌力將遠長驅至勃律擒勃律王吐蕃公主斬藤
橋以兵三千人戍於是拂林大食諸胡七十二國皆歸

國家款塞朝獻嗣業之功也繇此拜右威衛將軍十載
又從平石國及破九國胡并背叛突騎施以跳盪加特
進肅宗在鳳翔至德二年九月嗣業從廣平王收復京
城賊衆大敗走河北郭子儀遂收東都嗣業以功加開
府儀同三司衛尉卿封虢國公食實封二百戶乾元二
年正月與諸將同圍相州為流矢所中瘡欲愈臥於帳
中忽聞金鼓之聲因大叫瘡中血出數升注地而卒帝
聞之震悼嗟惜久之詔贈武威郡王其賻贈及緣葬事

所司倍於常式仍令官給靈輿遞還所在

王思禮為雲麾將軍金城太守祿山反哥舒翰為元帥
奏思禮加開府儀同三司兼太常卿充元帥府馬軍都
將肅宗至德二年九月思禮從元帥廣平王收西京既
破賊思禮領兵先入宮又從郭子儀戰陝城曲沃新店
賊軍既敗遷戶部尚書封霍國公食實封三百戶乾元
初與李光弼來朝勅朝官四品已上出郊迎上元初加
司空自武德以來三公不居宰輔唯思禮而已二年四

月薨贈太尉官給靈輿差鴻臚卿一人充使監護喪事
衛伯玉為神策軍兵馬使出鎮安西肅宗乾元二年十
月擊逆賊史思明偽將李歸仁破走之以功遷右羽林
軍大將軍知軍事轉四鎮北庭行營節度使獻俘百餘
人至闕下遷神策軍節度上元二年二月史思明領眾
西下圖長安史朝義率其黨夜襲陝州伯玉以兵逆擊
大破賊於永寧賊退進位特進封河東郡公

郭子儀為朔方節度使時安祿山反玄宗天寶十四載

十一月詔子儀東討祿山遣大同軍使高秀岩寇河曲
子儀擊敗之進收雲中馬邑開東陁以功加御史大夫
及肅宗即位祿山死詔子儀還鳳翔進位司空充關內
河東副元帥既平河東河西河南賊以功加司徒封代
國公食邑千戶尋入朝肅宗遣兵仗戎容迎于灞上肅
宗勞之曰雖吾之家國實繇卿再造及還東都命子儀
經營北討乾元元年七月破賊河上擒偽將安守忠以
獻遂朝京師勅百僚班迎於長樂驛進位中書令上元

三年二月用子儀為朔方河中北庭潞儀澤沁等州節度行營兼興平定國副元帥充本管觀察處置等使進封汾陽郡王出鎮絳州三月子儀辭赴鎮賜御馬銀器雜綵別賜絹四萬疋布五萬端以賞軍代宗即位以子儀守太尉充北道汾寧涇原河西已東通和蕃及朔方招撫觀察使後自涇陽入朝帝御安福門待之命子儀樓上行朝見禮宴賜隆厚

僕固懷恩世襲都督玄宗時為左領軍大將軍天寶十

五載與李光弼合勢及史思明戰于常山趙郡沙河嘉
山皆大破之功居多肅宗即位於靈武懷恩累從郭子
儀及廣平王破賊皆立殊功以前後功加開府儀同三
司鴻臚卿同正員同節度副使封豐國公食實封二百
戶乾元元年九月遣九節度擊安慶緒於相州從郭子
儀領朔方行營又副李光弼二年進封大寧郡王遷御
史大夫朔方行營節度使上元二年冬加工部尚書勅
李輔國及常參官等送上太官造食代宗即位以懷恩

副天下兵馬元帥雍王領河東節度行營及鎮西迴紇
兵馬赴陝州仍許懷恩母及妻隨懷恩之陝州行營迴
紇可敦即懷恩之女也時迴紇通會于陝州帝特崇姻
好以寵之

李光弼為河北節度使時玄宗幸蜀肅宗理兵於靈武
追光弼及郭子儀赴行在授光弼戶部尚書兼太原尹
北京留守同中書門下平章事及賊將史思明蔡希德
高秀崑牛廷珣等四偽帥率衆十餘萬來攻太原光弼

率敢死之士出擊大破之收清夷橫野等軍擒賊將李宏義以歸詔守司空兼兵部尚書中書門下平章事進封魏國公食實封八百戶乾元元年與關內節度使王思禮入朝勅朝官四品已上出城迎謁遷侍中改封鄭國公二年七月為天下兵馬元帥趙王係之副知節度行營事八月兼幽州大都督府長史出統河南諸軍於河內及收復懷州以功進爵臨淮郡王累加實封一千五百戶俄拜太尉內殿宴送御製詩以寵之朝臣畢和寶

應元年五月光弼進封臨淮王賜鐵券以代宗廣德二年薨及葬詔宰臣已下祖送於延平門

李抱玉為鄭陳潁亳四州節度肅宗乾元中史思明陷雒陽抱玉守河陽南城擊退賊帥周摯固河陽復懷州皆功居第一遷澤州刺史代宗即位為澤潞節度使加領陳鄭二州遷兵部尚書廣德元年吐蕃寇京師羣盜充斥詔抱玉兼鳳翔節度使討之以功遷司空

辛雲京為太原節度虜畏雲京不敢惕息太原大理無

烽火之虞累加檢校左僕射同中書門下平章事以代

宗大歷三年八月薨代宗追悼發哀冊贈太尉輟朝三

日十一月葬遣中使弔祭

時宰相及諸道節度使祭者凡七十餘幄饌葉彫飾器溉

豐盈窮極奢靡士庶觀者如堵

嚴武為劍南節度使成都尹代宗廣德二年破吐蕃七

萬餘衆拔當胸城十月取鹽川城改檢校吏部尚書封

鄭國公

田神功為平盧軍節度都知兵馬使擒逆賊劉展以功

遷檢校工部尚書汴宋等八州節度使代宗大歷三年
入覲尋加檢校右僕射赴尚書省視事特詔宰臣百官
送上仍加知省事以寵之入覲闕廷講疾信宿而終代
宗悼惜為之撤樂廢朝三日贈司徒賜絹一千疋布五
百端特許百官弔喪賜屏風茵褥於靈座並賜千僧齋
以追福至德已來將帥無兼三事者惟神功恩禮最篤
李納為平盧軍節度使時李希烈圍陳州納遣兵與諸
軍奮擊大破之因解圍加檢校司空封五百戶

李忠臣代宗時為淮西節度觀察使同華節度周智光
舉兵反詔忠臣與神策將李太清等討平之大歷二年
加檢校工部尚書實封通前三百戶五年加蔡州刺史
檢校右僕射知省事李靈曜之叛田承嗣使姪悅援之
忠臣與諸軍大破之汴州平十一年十二月加檢校司
空平章事

伊慎為果毅代宗大歷八年江西節度使路嗣恭討領
南哥舒晁之亂以慎為先鋒直逼賊壘疾戰破之斬晁

於泔溪函首獻于闕下嗣恭表慎功授連州長史知當
州團練使德宗時為蘄州刺史充節度都知兵馬使建
中末車駕在梁洋慎進兵迎擊李希烈之甥劉戒虛擒
之以功拜安州刺史兼御史大夫仍賜實封一百戶

馬璘為太常卿時蕃戎寇邊詔璘赴援河西廣德初僕
固懷恩不順誘吐蕃入寇代宗避狄陝州璘即日自河
右轉鬪戎虜追擊俘斬數千繇是雄名益振代宗還宮
召見慰勞之授兼御史大夫永泰中為涇原節度城堡

獲全虜不敢犯加檢校左僕射帝甚重之遷檢校左僕射知省事詔宰臣百僚於尚書省送上進封扶風郡王大歷十一年卒德宗悼惜之廢朝贈司徒

郝廷玉初為李光弼帳中愛將肅宗乾元中史思明再陷雒陽廷玉擒賊將徐璜玉解中澗之圍前後以戰功累授開府儀同三司試太常卿封安邊郡王累遷秦州刺史代宗大歷八年廷玉卒追錄舊勳贈工部尚書

王栖曜肅宗時為浙東節度王璠馬軍兵馬使代宗廣

德中草賊袁晁起亂台州御史中丞袁傜東討奏栖曜
為偏將生擒袁晁收復郡邑十六授常州別駕浙西都
知兵馬使時江左兵荒栖曜擊賊大潰遷試金吾大將
軍李靈曜反于汴州浙西觀察使李涵俾栖曜將兵為
河南犄角以功加銀青光祿大夫累加至御史中丞
張萬福代宗時為和州刺史行營防禦使時賊將康自
觀擁兵掠循淮而東萬福追而殺之代宗發詔以勞之
賜衣一襲宮錦十雙後自泗州刺史徵拜右金吾將軍

詔圖形凌煙閣數賜酒饌衣服並勅度支籍口畜給其費

薛嵩為相衛節度使卒代宗命工部尚書李冕使于相州弔祭

曲環自玄宗天寶中為果毅別將安祿山反守鄧州拒賊功居多超授左清道率又從李抱玉守河陽南城尋別將兵守澤州破賊驍將安曉勅特拜羽林將軍又將別部兵合諸軍同討史朝義平河北累轉金吾大將軍

因隨李抱玉移軍京西代宗大厯中領兵隴州頻破吐蕃加特進太常卿又詔以邠隴兵五千大破戎虜於劔南加太子賓客賜以名馬與諸將討涇州叛將劉文喜平之加開府儀同三司兼御史中丞充邠隴兩軍都知兵馬使累破李納逆黨以功最加御史大夫德宗建中三年十月加檢校左常侍充邠隴行營節度使又大破李希烈逆黨於陳州城下加檢校工部尚書兼陳州刺史希烈平加環兼許州刺史加實封三百戶後加檢校

左僕射卒廢朝一日贈司空賻布帛米粟有差

楊朝晟德宗建中初為甘泉府果毅從李懷光討劉文
喜於涇州斬獲生擒居多授驃騎大將軍稍為右先鋒
兵馬使後李納寇徐州從唐朝臣征討常冠軍鋒以功
授開府儀同三司檢校太子賓客德宗在奉天以朝晟
為左廂兵馬使下咸陽以挫朱泚加御史中丞實封一
百五十戶

李抱真為昭義軍節度使德宗建中三年田悅以魏博

反抱真與馬燧敗悅兵遂解臨洛及邢州之圍以功加
檢校兵部尚書復與燧圍魏州又敗悅於城下以功加
檢校右僕射興元初遷檢校左僕射平章事破朱滔於
經城以功加檢校司空食實封五百戶

李芑為河陽三城懷州節度觀察使與河東節度馬燧
等諸軍破田悅於洹水以功授檢校兵部尚書累封開
封郡王食實封一百戶

馬燧代宗時為河東節度使前政軍敗之後兵甲寡弱

燧乃塞險以遏奔衝及朝於京師加檢校兵部尚書令
還太原與諸軍擊敗田悅兵加燧同中書門下平章事
德宗初詔加燧魏州大都督府長史兼魏博貝等州節
度觀察招討等使及帝幸奉天引軍還太原及帝還京
加燧奉誠軍及晉絳慈隰節度使並管内諸軍行營副
元帥與渾瑊同討李懷光赴河中軍帝詔常參官送至
通化門懷光平乃下詔褒美遷光祿大夫並令還太原
是役也帝賜燧宸宸台衡二銘并序三年二月入朝冊

拜司徒侍中北平王仍賜妓樂及薨詔贈太傅祔廟宣
令所司供少牢仍給鹵簿從宅至廟并量供人夫兼令
太常博士檢校

渾瑊為折衝果毅節度使安思順遣瑊提偏師大破阿
布思部遷中郎將安祿山構逆瑊從李光弼出師河北
定諸郡邑遷右驍衛將軍及肅宗即位於靈武瑊統兵
赴行在至天德遇蕃軍入寇瑊擊敗之從郭子儀收兩
京討安慶緒破賊於新鄉改檢校太僕卿充武絳衛軍

使又從僕固懷恩討火朝義前後數十戰朝義平加開
府儀同三司太常卿賜實封二百戶又為朔方行營左
廂兵馬使從郭子儀討吐蕃於邠州以功加御史中丞
會吐蕃大入寇至奉天城拒戰於莫谷大破蕃軍以功
加太子賓客復屯於奉天華州周智光反郭子儀討之
令城領馬步萬人攻下同州智光平詔以邠寧慶三州
隸朔方軍郭子儀領之子儀令城先率兵至邠州便於
宜祿縣防秋歲餘加兼御史大夫代宗大歷十一年子

儀入朝令瑊知邠寧慶三州兵馬留後十三年回紇侵太原以瑊為石嶺關以南諸軍知兵馬使率兵逐之虜騎引退其年八月加檢校工部尚書兼單于副都護振武軍使十四年入為左金吾衛大將軍建中四年李希烈遣間諜詐為瑊書與希烈交通瑊奏其狀德宗特保證之仍賜瑊馬一匹並鞍轡錦綵二百疋興元元年正月以瑊為行在都知兵馬使二月賜實封五百戶是日德宗移幸山南城分布諸軍擊敗逆賊李懷光追射之

三月加檢校左僕射同中書門下平章事兼靈州都督
靈鹽豐夏等州定遠西城天德軍節度等使仍充朔方
邠寧振武等道兼永平軍奉天行營兵馬副元帥上臨
軒授鉞用漢拜韓信故事是月瑊將軍赴京畿破賊朱
泚六月加瑊侍中論收京城之功加實封八百戶七月
德宗還營以瑊守本官兼河中尹河中絳慈隰節度使
仍充河中同陝虢節度及管内諸軍行營兵馬副元帥
改封咸寧王九月賜瑊大寧里第女樂五人入第之日

宰臣節將送之又以李懷光未平加朔方行營兵馬副
元帥與河東節度使馬燧會兵進討貞元元年八月河
中平加檢校司空四年七月加邠寧慶副元帥十二年
二月加檢校司徒兼中書令諸使副元帥如故十五年
二月二日薨于鎮廢朝五日羣臣於延英奉慰詔贈太
師賻贈絹布四千疋米粟三千石及喪車將至又為廢
朝應緣喪事所司准式支給命京兆尹監護葬日賜絹
五百疋

田緒為魏博節度使時朱滔率兵兼引回紇之衆南侵
緒遣兵助王武俊李抱真大破朱滔于經城以功遷檢
校工部尚書

李晟為左羽林將軍代宗廣德初鳳翔節度使孫志直
署晟總遊兵擊破党項羌高玉等以功授特進試光祿
卿大歷初李抱玉鎮鳳翔署為右軍都將四年吐蕃圍
靈州抱玉遣晟擊之吐蕃因解靈州之圍而去拜開府
儀同三司無幾兼左金吾衛大將軍涇原四鎮北庭都

知兵馬使并總遊兵無何節度使馬璘與吐蕃戰於鹽倉兵敗晟率所部橫擊之拔璘出亂兵之中以功封合川郡王德宗即位吐蕃寇劍南乃詔晟將神策兵救之授太子賓客建中二年魏博田悅反將兵圍臨洛邢州詔以晟為神策先鋒都知兵馬使救臨洛尋加兼御史中丞三年正月復以諸道軍擊敗悅軍於洹水遂進攻魏州以功加檢校左散騎常侍實封百戶無幾兼魏府左司馬及王武俊攻趙州晟乃獻狀請解趙州之圍

欲引兵趨定州與張孝忠合勢欲圖范陽德宗壯之加
晟御史大夫德宗在奉天詔晟赴難晟引軍踰飛狐師
次代州詔加晟檢校工部尚書神策行營節度使實封
二百戶及李懷光反車駕幸梁州帝歎曰早從李晟之
言三蜀可坐致也詔授尚書左僕射同中書門下平章
事以安衆心後拜晟司徒兼中書令實封一千戶德宗
至自興元晟戎服謁見于三橋帝駐馬勞之賜永崇里
第及涇陽上田延平門之林園女樂八人入第之日京

兆府供帳酒饌賜教坊樂具鼓吹迎導宰臣節將送之
帝思晟勲力製紀功碑俾皇太子書之刊石立於東渭
橋又令太子書碑詞以賜晟後為中書令奉朝請貞元
四年三月詔為晟立五廟五年九月晟與侍中馬燧見
於延英殿上嘉其勲力詔圖其像於舊臣之次仍令皇
太子書其文以賜晟晟刻石於門左九年八月薨帝震
悼出涕廢朝五日令百官就第臨弔命京兆尹李充監
護喪事官給葬具賙賻加等比大斂帝手書致意送柩

前

謝元佐為宋州刺史德宗建中二年加兼御史中丞宋
亳節度等使李正己死子納匿喪謀叛而李洎以徐州
歸順納遣兵圍之詔元佐與諸軍援洎與賊接戰大破
之斬首萬餘級繇是轉輸路通加御史大夫收濮州降
將楊令暉分兵挾以徇濮陽遂降其將高彥超以通濮
陽津遷尚書累封四千戶兼曹濮觀察使

李元諒為鎮國軍節度副使德宗居奉天賊朱泚遣偽

將何望之襲華州遂據城元諒自潼關將所部遂拔華州軍益振以功加御史中丞是時尚可孤守藍田與元諒為犄角賊東不能逾渭南元諒功居多遷華州刺史兼御史大夫潼關防禦鎮國軍節度使尋加檢校工部尚書興元元年五月詔元諒與副元帥李晟進收京邑帝還宮加檢校尚書左僕射實封七百戶賜甲第女樂貞元三年詔元諒將本軍從渾瑊與吐蕃會盟于平涼與瑊俱申號令嚴其部伍而還時謂元諒有將帥之風

德宗嘉之賜馬十匹金銀器錦綵等甚厚四年春加隴
右節度支度營田觀察臨洮軍使移鎮良原九年十一
月卒帝甚悼惜廢朝三日贈司空賻布帛米粟有差
杜希全為朔方軍節度使德宗居奉天希全首將所部
以赴難加檢校戶部尚書行在都知兵馬使

邢君牙初為平盧軍兵馬使累從田神功戰伐歷將軍
試光祿勳神功既為兗鄆州節度令君牙領防秋兵入
鎮好時屬吐蕃凌犯代宗幸陝君牙隸屬禁軍扈從又

以戰功加鴻臚卿封河間郡公德宗貞元三年遷右神
策軍行營節度鳳翔隴州觀察使加檢校工部尚書吐
蕃犯邊且耕且戰西戎不能為患尋加檢校右僕射十
四年卒廢朝一日贈司空賻布帛米粟有差

尚可孤德宗建中四年為兼御史中丞荆襄應援淮西
使以所統之衆赴山南累有戰功及涇原兵叛詔徵可
孤軍至藍田擊破之興元元年三月遷檢校工部尚書
兼御史大夫神策京畿渭南商州節度使五月李晟率

可孤收京城可孤為先鋒京師平以功陞檢校右僕射
封馮翊郡王增邑通前八百戶實封二百戶及李懷光
以河中叛詔可孤帥師與諸軍征討次於沙苑遇疾卒
于師贈司空賻布帛米粟甚厚喪葬所須並令官給

劉濞幽州節度使怱之次子怱卒子濟代任表濞為瀛
州刺史無何怒兄濟乃請以所部西捍隴塞拔瀛州兵
一千五百及男女萬餘口直趨京師部伍齊整無一人
犯令者德宗召濞賜讌於凌煙閣甚被恩寵拜金紫光

卷三百八十五
祿大夫檢校太子賓客兼秦州刺史御史大夫隴右經
畧軍使其麾下兵士賜名隴右軍以普潤縣為理所賜
本錢五萬貫以自給

程懷直為橫海軍節度使德宗貞元十三年來朝加檢
校尚書右僕射仍賜安業坊甲第一區妓一人他賜有
差令歸滄州

戴休顏為鹽州刺史奉天之難倍道以所部蕃漢三千
人號泣赴難德宗嘉之賜實封二百戶及李晟收京師

既清宮闕休顏與渾瑊等率兵赴岐陽邀擊朱泚餘衆
及策勲加檢校右僕射實封至六百戶扈駕至京特賜
女樂甲第

楊惠元為神策京西兵馬使及田悅反叛詔惠元領禁
兵三千與諸將討伐戰御河奪三橋皆惠元之功也加
檢校工部尚書

李臯為江西道節度使洪州刺史李希烈反臯分兵大
破蔡山賊拔蘄州降其將李良又取黃州舒王為元帥

加臯前軍兵馬使德宗居奉天臯遣伊慎敗杜少誠以
功加銀青光祿大夫進封五百戶

王武俊為成德軍節度使德宗貞元十三年祔祖禰私
廟令所司供少牢量借儀衛人夫仍令太常博士檢校
十七年薨廢朝五日羣臣詣延英門奉慰如渾瑊故事
詔左庶子李上公持節贈太師絹三千疋布千端粟三
千石

劉昌德宗時攝濮州刺史李希烈既陷汴州昌以三千

人守寧陵躬勵士卒大破希烈擒其將翟曜希烈退保
蔡州自此不復侵軼詔加檢校工部尚書增實封通前
二百戶貞元中為涇原節度等使詔城平涼又於平涼
西別築胡谷堡遂以保寧邊鄙加檢校右僕射

張建封為徐泗節度使德宗貞元十三年入覲特以雙
日開延英召對又令建封朝參入大夫班皆示寵厚之
十四年上已賜中書門下及兩省供奉官宴於曲江特
令建封與諸相同榻而食貞元已後元帥節制累有入

朝及却還鎮如馬燧渾瑊劉元佐李抱真曲環之崇秩
洪勲未有獲御製詩以送之建封將還鎮特賜詩及出
城又令高品中使齋常所執鞭以賜之曰以卿忠貞節
義歲寒不移此鞭以朕久執用故以賜卿表卿忠節也
建封又獻詩一首以自警勵

曹華仕宣武軍為牙校吳少誠叛本軍以華驍果有智
略用為襄城戍將蔡賊攻襄城華屢敗之德宗特賜旗

甲

韓全義為蔡州行營招討處置使德宗貞元十七年正月甲寅至京帝命中使就第宣慰焉壬戌宴全義於麟德殿

張茂昭為義武軍節度使德宗貞元二十年十月來朝累陳奏河北及西北邊事語甚忠切德宗屢嘆曰恨見卿之晚錫宴于麟德殿賜良馬甲第及器用錦綵極厚憲宗元和五年冬來朝十二月十二日至京師故事雙日不坐是日特開延英殿對之五刻因請遷祖考之墓

來歸京兆在朝兩月未之鎮頭發瘍卒廢朝五日册贈
太師賻絹三千疋布一千端米粟三千石喪事並令官
給命京兆尹李充監護

劉濟憲宗元和初為幽州節度使招討王承宗諸軍未
進濟獨率先前軍擊破之獻逆將於闕優詔褒之明年
春將大軍次瀛州前後大獻俘獲賞功頗厚仍錄功拜兼
中書令

程執恭為橫海軍節度使憲宗元和四年來朝還鎮賜

廐馬一匹及槍甲兩河節制久無脩覲禮者故嘉而寵之

田弘正為魏博等州節度使憲宗元和十三年王師加兵於鄆詔弘正與五鎮之師會軍齊進時李師道遣大將劉悟率重兵以抗弘正前後合戰魏軍大捷十四年劉悟以河上之衆倒戈入鄆斬師道首詣弘正請降淄青十二州平論功加檢校司徒同中書門下平章事是年八月弘正入覲憲宗待之隆異對於麟德殿進加檢

校司徒兼侍中實封三百戶

田布弘正第三子也弘正節制魏博布掌親兵國家討
淮蔡布率偏師隸嚴綬軍於唐州授檢校祕書監兼殿
中侍御史前後十八載破凌雲柵下郾城布皆有功擢
授御史中丞及淮西平拜左金吾衛將軍兼御史大夫
李愬憲宗時為檢校右散騎常侍兼鄧州刺史充隋唐
鄧節度使討蔡賊吳元濟擒之詔以愬檢校尚書左僕
射兼襄州刺史山南東道節度襄鄧隋唐復郢均房等

州觀察等使上柱國封涼國公食邑三千戶食實封五百戶憲宗有意復隴右故地授愬鳳翔隴州節度使未發屬李師道再叛移愬為徐州刺史武寧軍節度及淄青平將有事燕趙以愬檢校左僕射同中書門下平章事潞州大都督府長史昭義節度使仍賜興寧里第又遷魏州大都督府長史魏博節度使後為太子少保歸東都長慶元年十月卒於雒陽穆宗聞之震悼賙賻加等贈太尉

李聽憲宗元和中為楚州刺史統淮南之師討李師道
山東平以功授檢校左散騎常侍穆宗長慶四年為義
成軍節度使初討李同捷時魏博行營將丁志紹潛結
滄鎮擅迴戈攻其帥史憲誠詔聽帥師援之大破其叛
卒志紹奔鎮州為王庭湊所殺遂凱旋以功封涼國公

王智興憲宗元和中為侍御史徐州都押衙王師誅李
師道智興率徐軍八千會諸道之師進擊大破賊於金
鄉拔魚臺俘斬萬計以功遷御史中丞賊平授沂州刺

史長慶初河朔復亂徵兵進討穆宗素知智興善將遷
檢校左散騎常侍兼御史大夫充武寧軍節度副使河
北行營都知兵馬使

李光顏為忠武軍節度使元和十一年連敗蔡賊吳元
濟之衆拔賊凌雲柵憲宗大悅賜其告捷者奴婢銀錦
進位檢校尚書右僕射十二年賊平加檢校司空十三
年春命中官宴光顏於居第賜芻米二十餘車憲宗又
御麟德殿召對賜金帶錦綵十四年西蕃入寇授邠寧

節度使光顏擊賊退之穆宗即位就加特進尋詔赴闕
賜開化里第進加同中書門下平章事穆宗以光顏功
冠諸將故召赴闕讌賜優給已而帶平章事復鎮所以
報勲臣也長慶初遷鳳翔節度使依前檢校司空同中
書門下平章事歲末復授許州節度使赴鎮日宰相百
僚以故事送別於章敬寺穆宗御通化門臨送之賜錦
綵銀器良馬玉帶等物

烏重胤憲宗時為河陽三城節度使會討淮蔡與李光

顏犄角相應大小百餘戰以至誅吳元濟就加檢校尚書右僕射

韓公武為鄜州節度使來朝憲宗元和十三年正月帝御麟德殿召對賜以銀器繒錦及馬

王沛為李光顏行營兵馬使別統勁兵攻討吳元濟蔡賊平隨光顏入朝光顏具陳沛功加御史大夫統兵還鎮光顏受詔討鄆寇及李師道誅詔分許州兵戍于邠以沛為都將救鹽州擊退吐蕃以功加寧州刺史遷陳

州又汴州李峇反詔沛兼忠武軍節度副使率師討峇
平之加檢校右散騎常侍

劉悟為鄆州李師道牙門都將及王師致討師道遣悟
將兵援田弘正悟因迴軍趨鄆圍其內城兼以火攻其
門不數刻梟師道以獻元和末悟自淄青都知兵馬使
兼監察御史擢拜檢校工部尚書兼御史大夫義成軍
節度使封彭城郡王仍賜實封五百戶錢二萬貫莊宅

各一區

朱克融為盧龍軍節度副大使知節度事兼幽州長史
敬宗寶曆二年五月卒詔贈司徒仍令所司擇日備禮
冊命仍賻布帛三百段米粟二百石差光祿大夫崔芸
充弔祭使通事舍人韋翹充副使將作監王堪充冊贈
使金部郎中蕭澣充副使

劉沔為振武軍節度使單于大都護文宗開成中党項
雜虜大擾河西沔率吐渾契苾沙陁三部落諸族討襲
大破之告捷而還以功進檢校戶部尚書會迴紇部饑

烏介可汗奉太和公主至漠南求食移沔河東節度使
詔與幽州張仲武協力招撫迴紇竟破虜寇迎公主還
宮以功進位檢校司空

李載義為幽州盧龍軍節度副大使文宗太和三年命
中使以白玉帶就幽州賜之示殊恩也五年載義入覲
帝以載義有平滄景之功冊拜太保同中書門下平章
事仍詔中使以米麩粟豆油鹽共一千石錢二千貫綾
絹二千疋柴四十車草一萬束就永寧里第宣賜又令

尚食日給十人生料翌日又命以良馬并鞍就第以錫
下及賓佐將吏無不廣霑恩錫

楊元卿為河陽節度使時魏博軍亂元卿領涇軍赴援
詔賜元卿綾絹三萬疋茶五千斤葛五千疋

石碓為河中晉絳節度使俄而昭義劉從諫卒其子禎
擅主軍務朝議問罪令徐帥李義佐為招撫使越烏嶺
破賊五砦斬獲千計武宗聞捷大悅謂侍臣曰今之義
而有勇字有雄比者及賊平進加檢校司空

張仲武武宗會昌中為幽州都督府長史兼御史大夫
蘭陵邵玉俄而回鶻擾邊仲武遣其弟仲至與裨將游奉
寰王如清等率銳兵大破之武宗詔加檢校兵部尚書
兼東面招撫回鶻使

張允仲為幽州節度懿宗咸通十年徐人作亂允仲請
以弟允臯領兵伐叛懿宗不允進助軍米五十萬石鹽
二萬石詔嘉之賜以錦綵玉帶金銀器等

王重榮僖宗時為河中節度中和元年重榮傳詔徵兵

明年李克用領軍至大敗巢賊收復京城其倡義啓導之功實重榮居首京師平以功進檢校太尉同平章事王處存為義武軍節度使時黃巢犯闕僖宗出幸處存不俟詔命即率本軍入援洎收京師王鐸第其功云勤王舉義處存為之最以功加檢校司空又遣大將張公慶率勁兵三千合諸軍滅巢賊於泰山以功進檢校司空平章事

錢鏐以昭宗天祐二年正月十二日丙寅行冊命勅定

亂安國功臣鎮海鎮東軍節度使浙江東西兩道觀察處置淮南東西行營招討營田安撫兩浙鹽鐵制置發運等使開府儀同三司守侍中兼中書令杭越兩州刺史吳王錢鏐總臨兩鎮早立殊功撫制三吳久聞異政一榮封爵再換星霜蓋緣道路阻艱遂致冊書留滯近者潭洪水陸並已通流元勳舉議請行典禮冀免稽於制命俾速達於冊恩須議施行實為允當明甄酬之寵諧僉屬之情其所封吳王策禮宜令所司擇日備禮冊

命

冊府元龜卷三百八十五